

3 Պ. Հարությունյանն իր այդ ախալ անսակտնեւրն արտահայտել է նաև իր ղդկտորական դիւերտացիայի ավտոռեֆերատում: Տե՛ս «Освободительное движение армянского народа в I четверти XVIII века», Москва, 1951, стр. 35—39.

Ինչպես հայտնի է, Սյունիքի 1722—1730 թթ. հայ ազատագրական շարժումների պատմության միակ աղբյուրը, եթե նկատի չունենանք մի շարք լրատուցիչ մանր տվյալներ, դեպքերին սկզբից մինչև վերջ մասնակից Ստեփանոս Շահումյանի թելադրած և Մխիթարյան Միաբանության անդամներից մեկի՝ Ղուկաս վ. Ստեփանյան Սեբաստացու 1737 թ. գրի առած պատմությունն է¹։

Ստեփանոս Շահումյանի պատմության մեջ Սյունիքի հայ ազատագրական շարժումներն սկսվում են 1722 թվականից և մինչև 1726 թվականը ուղղվում պարսկական բռնապետության և նրան հավատարիմ մնացած տեղական խասերի ու մելիքների դեմ, իսկ 1726 թվականից մինչև 1730 թ. օսմանյան զավթիչների դեմ։ Ըստ որում, ազատագրական շարժումները 1722—1728 թվականներին գլխավորել է Դավիթ-Բեկը, իսկ նրա մահից հետո՝ 1728 թվականից մինչև 1730 թ., Մխիթար սպարապետը։ 1730 թ. Մխիթար սպարապետի ողբերգական սպանությունից հետո օսմանյան զավթիչների կողմից ճնշվում են Սյունիքի ազատագրական շարժումները։

Ընկ. Հարությունյանն իր հիշյալ հոդվածում աշխատում է պատմիչի հաղորդած այդ փաստերը քննադատորեն վերանայելու Այգ, Իհարկե, լավ է։ Անցյալի գրական ժառանգությունը պետք է քննադատաբար օգտագործել և բավականաչափ հավաստի փաստեր ունենալու դեպքում համարձակորեն վեր հանել մեր պատմագրության մեջ թույլ տրված սխալներն ու թերությունները և ճշտել դրանք։ Սակայն, մեր կարծիքով, Պ. Հարությունյանն առանց հիմնավոր փաստեր ունենալու, առանց ժամանակի դեպքերը մանրակրկիտ ու ուշադիր ուսումնասիրելու, և երբեմն էլ ելնելով պատահական թյուրիմացություններից, պատմիչի հաղորդած փաստերի մեջ աշխատում է մտցնել անհիմն ճշտումներ։

Ամենից առաջ անհրաժեշտ է քննել այն հարցը, թե պատմիչը՝ Ստեփանոս Շահումյանը, որքան հավաստի աղբյուր է։ Ստեփանոս Շահումյանի պատմության հավաստիության օգտին են խոսում երկու հանգամանք։ Նախ՝ Շահումյանը ոչ միայն դեպքերին ժամանակակից ու ականատես է եղել, այլև ակտիվ մասնակից։

Ավելորդ չենք համարում մեջ բերել Ստեփանոս Շահումյանի պատմության գրչի՝ Ղուկաս Ստեփանյանի հետևյալ խոսքերը. «Զորս ետուն գրել, որք իսկզբանէ մինչև ցվախճան յառաջադէմ լեալք էին յամենայն պատերազմունս, և ականատես իրանցն եղելոց, այսինքն Ստեփանոս Վրդանէսեան, որ ի տանէն էր Շահումեան, ի գաւառէ փոքր Սիւնեաց, և յաւանէն Երկտաստանաց, և այլ ոմանք ընդ նմա»²։ Ղուկաս Ստեփանյանի այդ վկայությունը ոչ մի կասկած չի թողնում, որ պատմիչն իր հաղորդած դեպքերը գիտե հանգամանորեն։ Երկրորդ՝ Ստեփանոս Շահումյանի պատմության մեզ հասած հինգ գրչագրերում էական տարբերություններ չկան և առայժմ մեր պատմագրությանը հայտնի չէ մեզ հասած ձեռագրերում կատարված որևիցէ կեղծում։

Այն հարցը, թե Ստեփանոս Շահումյանն ժամանակակից դեպքերը որքան հարազատ ու ճշմարիտ է հաղորդում, վերադեցրել է ոչ միայն Պ. Հարությունյանին, այլև ուրիշներին։ Այդ հարցի վրա դեռևս 1919—1921 թթ. ուշա-

¹ Ստեփանոս Շահումյան, Ընտիր պատմութիւն Դավիթ Բէկին, և պատերազմաց հայոցն Խափանու, որք եղեն ընդդէմ թուրքաց ի մերում ժամանակի, այն է յամի տեառն 1722, և հայոց 1171, Վաղարշապատ, 1871։

² Նույն տեղում. տես տիտղոսաթերթը։

դրությունը է դարձրել պրոֆեսոր Լեոն, իսկ հետագայում ամբողջադարձել են սովետահայ մի շարք պատմաբաններ:

Ստեփանոս Շահումյանի մոտ կան մի շարք չափազանցություններ: Նախ՝ պատմիչը որպես դեպքերի ակտիվ մասնակից, աշխատել է իր դերը բարձրացնել և Սյունիքի հայ ազատագրական շարժման նախաձեռնությունն իրեն վերագրել, ինչպես նկատել է Լեոն, նաև Պ. Հարությունյանն իր վերոհիշյալ հոդվածում¹:

Մյուս կողմից՝ պատմիչը կոնկրետ պատերազմական գործողությունները նկարագրելիս, ձգտում է մեծացնել թշնամու ուժերը և ընդհակառակը փոքրացնել հայ ապստամբ մարտիկների քանակը, նպատակ ունենալով շեշտել հայ ժողովրդի մարտունակությունն ու հայրենասիրությունը:

Այդ չափազանցությունները նկատի ունենալով, ընկ. Հարությունյանը կասկածի տակ է առնում Շահումյանի հաղորդած փաստերից մի քանիսը, ենթադրելով, որ նա աղավաղում և շփոթում է նույնիսկ ապստամբության դիտվոր դեպքերի տարեթվերը, նրանց հաջորդականությունը, ապստամբության պարտոթյան տարին, անգամ ապստամբության երկու ղեկավարների, Դավիթ Բեկի մահվան և նրան հաջորդող Մխիթար սպարապետի սպանության տարեթվերը:

Նախ հարց է առաջանում, ինչպես է պատահել, որ սկզբից մինչև վերջը դեպքերին ականատես և մասնակից պատմիչը այդ աստիճան անտեղյակություն է ցուցաբերել: Դուցե ընկ. Հարությունյանը կարծում է, որ պատմիչն այդ աղավաղումները կատարել է դիտավորյալ կերպով, բայց այդ դեպքում պետք է ցույց տալ և հիմնավորել — մի բան, որ չի անում Հարությունյանը և մենք կարծում ենք, անելու հիմք էլ չունի:

Պ. Հարությունյանի հիմնական փաստարկումներից մեկն այն է, որ 1726 թվականի մարտի 24-ին Ղափանի ս. Աստվածածին կոչված եկեղեցում գրված և ռուսական կառավարությանն ուղարկված ուղերձի տակ Դավիթ-Բեկի ստորագրությունը չկա, այլ այդ փաստաթղթի տակ ստորագրել են Մխիթար սպարապետը և մի շարք յուզբաշիններ, կնքելով 8 կնիքներով: Իլնելով դրանից Պ. Հարությունյանը ենթադրում է, որ Դավիթ-Բեկն այդ ժամանակ կենդանի չէր. այլապես ինչպես կարող էր Սյունիքի հայ ազատագրական շարժման ընդհանուր ղեկավարը՝ ապատագրական շարժման ճակատագրի հետ կապված այսպիսի կարևոր փաստաթղթի տակ, չստորագրել: Այստեղից էլ հոդվածագիրը եզրակացնում է, որ Դավիթ-Բեկը պետք է մահացած լինի 1725 թ. վերջին կամ 1726 թ. սկզբին, այսինքն մինչև հիշյալ ուղերձի գրվելը և ոչ թե 1728 թվականին, ինչպես վկայում է պատմիչը²:

Ընկ. Հարությունյանն անհիմն կերպով փոխելով Դավիթ-Բեկի մահվան տարեթիվը, փոխում է նաև ազատագրական շարժման երկրորդ էտապի համարյա բոլոր գլխավոր դեպքերի տարեթվերը, այդ թվում և Մխիթար սպարապետի սպանության տարեթիվը:

Ստեփանոս Շահումյանի պատմության և Մխիթար-Բեկի կողմից ռուսա-

¹ Լեոն, Հայոց պատմություն, հատոր 3-րդ, Երևան, 1946, էջ 668: Պ. Հարությունյան, նույն տեղում, էջ 83—86:

² Պ. Հարությունյան, Հայկական ՍՍԽ ԳԱ Հաս. գիտ. «Տեղեկագիր», 1952, № 3, էջ 87—88:

կան կառավարութեանն ուղարկված հիշյալ ուղերձի ուշադիր ուսումնասիրութիւնը մեզ բերել է այլ եզրակացութեան:

Մեր կարծիքով, երբ 1726 թ. գարնան սկզբին օսմանյան մեծաթիվ դորքերը թափանցել են Սյունիքի սահմանները, հայ աղատագրական շարժման զինվորականութեան մի մասի մեջ առաջացել են հուսալքման տրամադրութիւններ և նրանք երբեմն ամբողջ զորախմբերով իրենց զորապետների գլխավորութեամբ թողել ու հեռացել են Դավիթ-Բեկի բանակից. Դավիթ-Բեկից հեռացել է նաև Մխիթար սպարապետը:

Մխիթար սպարապետը, ինչպես այդ երևում է օսմանցիների դեմ նրա հետագա գործողութիւններից՝ չի դավաճանել հայ աղատագրական շարժումներին, այլ այդ ժամանակ դժգոհ լինելով Դավիթ-Բեկից, ցանկացել է նրանից հեռացած զինվորականութիւնը համախմբել իր շուրջը և ինքնուրույն կերպով շարունակել պայքարն օսմանցիների դեմ: Ահա հենց այդ ժամանակ էլ, 1726 թվականի մարտի 24-ին, Մխիթար սպարապետի և մի շարք այլ յուզբաշինների կողմից, անկախ Դավիթ-Բեկից, ռուսական կառավարութեանը գրվել է այդ ուղերձը:

Մեր այս կարծիքը հաստատվում է հետևյալ փաստերով:

Ստեփանոս Շահումյանը, անդրադառնալով աղատագրական շարժման այդ ծանր օրերին, Դավիթ-Բեկին լրողների ու նրանից հետացողների մասին խոսում է ընդհանրապես, իսկ Դավիթ-Բեկի հետ մնացած մարդկանց հիշում է մեկ առ մեկ և այդ մարդկանց շարքում չի հիշատակում Մխիթար սպարապետի անունը:

Ստեփանոս Շահումյանն ասում է. «Յայնժամ ամենայն բնակիչք գաւառին, առ հասարակ խռովեցան, սասանեցան, թողին լքին զԴավիթ...: Եւ մնաց միայն Դավիթ և օթն և տասն սպառազէն արամբ ի յանապատն Հալի-ձորոյ, ուր կանգնեալ էր զանառիկ բերդն: Ընդ նմա էին նաև երեք եպիսկոպոսոնք Տաթևու, Երկոտասան քահանայք, զհետ զնացին նաև Տէր-Աւետիսն, և Մելիք Փարսաղան սակաւ ոմամբք, զի զօրքն ամենեքեան թօթափեցան ի նոռանէ»¹:

Պատմիչի այս վկայութիւնից պարզ երևում է, որ Մխիթար սպարապետն այդ ժամանակ Դավիթ-Բեկի հետ չէր. ինչպես հայտնի է, նա Սյունիքի հայ աղատագրական շարժման մեջ՝ երկրորդ մարդն էր. Դավիթ-Բեկից հետո և չէր կարող պատահել, որ մյուս զորապետների՝ Տեր-Ավետիսի և Մելիք-Փարսաղանի անունները հատուկ հիշատակվեն, իսկ նրա անունը չհիշատակվեն:

Մեր այս կարծիքը հաստատվում է նաև այն փաստով, որ ռուսական կառավարութեանն ուղարկված ուղերձի տակ Մխիթար սպարապետը (Մխիթար-Բեկը) չի ստորագրել որպես Ղափանի հայ աղատագրական շարժման ընդհանուր ղեկավար, այլ որպես մի զորապետ՝ ունենալով միայն երկու ենթակա յուզբաշիններ, իսկ մյուս յուզբաշինները, այդ թվում և Ավթանդիլ-Բեկը, ստորագրել են որպես ինքնուրույն յուզբաշիններ: Ուղերձի յոակ դրված է. «Դրեցաւ ի ձեր ծառայից յետնեալ ծառայ՝ Մխիթար պէկէս, և սորին մատակարար ուղապաշիքս՝ Եղեաղար, և Նադիր Եղեաղարէ. ևս այլ ուղապաշոցէ՝ Աւթանտիլ պէկէ, Պապասէ, Պայրնդուրէ, Զօհրապէ, ողջուն և զիտութիւն լիցի արքային և իւր ազնուական իշխանացն՝ վասն Աստուածոյ սէրն զի խնդիրք

¹ Ս. Շահումյան, Ընտիր պատմութիւն Դավիթ Բեկին..., էջ 43-44:

մերոյ մէջ անտես առնուք: Եւս գրեցաւ յերկիրն Ղափանս՝ ի դուռն սուրբ: Աստուածն թվին ՌՃՀԵ. մարտի ԻԴ: Վերջ:

Ովանէս Ուղւպաշէս, Ղափանա մէլիք Պալասանէս»¹:

Եթե Դավիթ-Բեկն այդ ժամանակ մահացած լիներ և եթե հայ ղինվորականութիւնը Մխիթար սպարապետին ընտրած լիներ Սյունիքի հայ ազատագրական շարժման ընդհանուր ղեկավար, ինչպես կարծում է Պ. Հարությունյանը, ապա այդ դեպքում, պետք է, բոլոր յուզբաշիններն էլ ստորագրեին որպէս «մատակարար» յուզբաշիններ և ոչ թե՛ «այլ» յուզբաշիններ:

Կասկածից դուրս է նաև, որ այդ «այլ» յուզբաշինները Ստեփանոս Շահումյանի հիշատակած այն յուզբաշիններից էին, որոնք նույնպես հետագային Դավիթ-Բեկից և Մխիթար-Բեկի ազդեցութեամբ համախմբվել ու ծրագրում էին թշնամու դեմ գործել անկախ Դավիթ-Բեկից:

Մխիթար սպարապետը Դավիթ-Բեկից առաջին անգամը չէր, որ դժգոհում էր: Ստեփանոս Շահումյանը հաղորդում է Դավիթ-Բեկից Մխիթար սպարապետի մի այլ լուրջ դժգոհութեան և նույնիսկ ադատադրական շարժման նկատմամբ նրա թշնամական գործողութեան մասին: «Բայց խանն Բարքուշատա, — հաղորդում է Ստեփանոս Շահումյանը, — ածապարեալ ընդ առաջ ելանէ սոցա (հայերին), ի կողմանս խոտանանու բազում զօրօք: Իսկ զօրականքն հայոց իբրեւ պայն տեսին, սաստկացուցին ի վերայ նոցա զպատերազմն մինչև յետս նահանջեցին զնոսա անտի, և սկսան յարկանել զվիրավորս ի նոցանէ:

Այլ զի Մխիթար սպարապետն խոռվեալ էր ընդ տեառն իւրոյ Դաւիթ, ուստի իբրև սկսան սոքա հարկանել զթշնամիսն, և վանել, հրամայեաց Մխիթար զօրավարացն յետս գալ ի պատերազմէն, և արարին այնպէս, բայց յառաջամարտիկքն իբրև տեսին, թէ վկնի եղեալ զօրքն դարձան յետս, համարեցան, թէ ի փախուստ դարձան ի պատերազմէն, և սկսան իւրաքանչիւրքն խոյս տալ ևլանել ի պատերազմէն: Յայնժամ զօրքն թշնամեաց իբրև զայն աղմուկ շփոթի տեսանէին, ընդդէմ դառնային սոցա, ի վերայ յարձակէին, հասանէին, և հարկանէին ի սոցանէ երեք կամ չորեք հարիւր այր, և զոմանս ի նոցանէ կենդանի կալեալ մեծաւ տանջանօք ի Բարքուշատ ածին, ընդ որս էր և Ստեփանոս Շահումեան: Եւ զայն լսէր Դաւիթ, ի սրտմտութիւն բարկութեան բողէր ի վերայ Մխիթարայ, և հրամայէր զկառափն հարկանել: Բայց միջնորդ լեալ մեծամեծացն հալիւ դարձուցին զվճիռ մահուն»²:

Մխիթար սպարապետի և Դավիթ-Բեկի այդ տարաձայնութիւնները իրենց արտահայտութիւնն են գտել Սյունիքի հայ ազատագրական շարժումների վերաբերյալ ժողովրդական ավանդութիւններում: Այդ մասին ազգագրագետ Ե. Լալայանի գրի առած ժողովրդական զրույց-ավանդութիւններում ասված է հետևյալը. «...Թշնամիներին ընդդիմադրելու համար Ստեփանոս իշխանը խորհուրդ է տալիս մելիք-Փարսաղանին, որ յետ կանչէ Վրաստանից Դաւիթ-Բէկին: Սակայն Մխիթար սպարապետը ընդդիմանում է ասելով յազգիները գալիս են թող գան, ով տղամարդ է՝ թող անուն հանէ: Կարիք չկայ Դաւիթ-Բէկին կանչելու»: Մելիք-Փարսաղանը ենթարկում է Մխիթար սպարապետի ազդեցութեան և չի համաձայնում կանչելու: Ստեփանոս իշխանը տես-

¹ Պ. Հարությունյան. նույն տեղում, էջ 99:

² Ս. Շահումյան. Ընտիր պատմութիւն Դաւիթ Բէկին..., էջ 39—41:

նում է. որ Մխիթար սպարապետը հետամուտ է միայն իւր քաղկի գործութիւնը ցոյց տալու և նրա պէտք չէ, որ երկիրն աւերում է¹:

Մեզ թվում է, որ այդ փաստերը հիմնավոր կերպով հաստատում են, որ Մխիթար սպարապետն ազատագրական շարժումների ընթացքում իրոք դժգոհել է Դավիթ-Քեկից և աշխատել է թշնամու դեմ գործել նրանից անկախ: Ինչպէս տեսանք Շահումյանից կատարված մեջբերումից, այդ դժգոհությունները՝ մինչև ազատագրական շարժման 1726 թ. գարնան ծանր օրերը, արտահայտվել են այն աստիճան սուր կերպով, որ Դավիթ-Քեկը նույնիսկ հրամայել է մահապատժի ենթարկել իր սպարապետին: Այսքանից հետո մի՞թե պարզ չէ, որ Մխիթար սպարապետը Դավիթ-Քեկի այդ ծանր օրերին կարող էր վրեժխնդրությամբ երես թեքել նրանից:

Որ Ռուսական կառավարությանն ուղարկված ուղերձը Մխիթար սպարապետի և մյուս յուզբաշինների կողմից գրվել է Դավիթ-Քեկից և նրան հավատարիմ մնացած մարդկանցից անկախ, գուցե և գաղտնի, այդ երևում է նաև նրանից, որ Ստեփանոս Շահումյանն այդ մասին ոչ մի հիշատակություն չի անում: Դեպքերին ակտիվ մասնակից Շահումյանը չէր կարող չիմանալ այդ կարևոր փաստաթղթի մասին, եթե այն իրոք գրված լիներ ազատագրական շարժման ընդհանուր ղեկավարի կողմից: Իսկ որ Դավիթ-Քեկը 1726 թ. գարնանը, ուղերձի գրվելու ժամանակ կենդանի էր, այդ հաստատվում է նախ՝ պատմիչի ուղղակի ցուցումից, թե Դավիթ-Քեկը մահացել է 1728 թվականին. «Իւ եղև ի ժամանակին յայնմիկ,— ասում է Ստեփանոս Շահումյանը,— հիւանդանալ Դաւիթ և մեռանիլ իսկ խաղաղութեամբ ի տան իւրում ի Հալիձոր, յամի տեառն 1728, և թուականութեանն հայոց 1177, կացեալ ամս վեց յիշխանութեան իւրում ի խափան»²: Պատմիչի այս ցուցումի մեջ Դավիթ-Քեկի մահվան տարեթիվը կրկնվում է երեք ձևով: Մեր կարծիքով այդ բավական զորեղ փաստ է և այն ժխտելու համար պետք է ունենալ հիմնավոր փաստեր:

Բացի այդ ակնհայտ է 1726—1728 թվականներին Դավիթ-Քեկի գործունեությունը Սյունիքի ազատագրական շարժման մեջ: Պ. Հարությունյանը հայտարարում է, որ Ստեփանոս Շահումյանը 1726—1728 թվականների ընթացքում կատարված դեպքերից և ոչ մեկը կոնկրետ կերպով չի կապում Դավիթ-Քեկի հետ, այլ նրա մասին ընդհանուր խոսքեր է ասում, որովհետև Դավիթ-Քեկն այդ տարիներին կենդանի չէր³:

Այդ հայտարարությունը նույնպես անհիմն է: Բերենք մի քանի կոնկրետ օրինակներ: 1726 թ. գարնանը օսմանցիները Ղափանում առաջ են շարժվում. Դավիթ-Քեկի զորախմբերի մի մասը նրան լքում և հեռանում է, իսկ Դավիթ-Քեկը անհողորդ շարունակում է մարտը: Ստեփանոս Շահումյանը հետևյալն է գրում այդ մասին.

«Բայց Դաւիթ յայսմ ամենայնի ոչ լքաւ, ոչ կասեցաւ ի խորհրդոցն, ոչ զանգիտեաց ի բազմութենէ բարրարոսացն, և ոչ զաղարեցաւ ի քաջագործութեանցն, և ոչ յուսահատեցաւ յԱստուածային խնամոցն: Այլ արիարար զբերդն ամրացուցանէր, զհամբար բերդին պատրաստէր, զզօրականսն առ ինքն ժողո-

¹ «Ազգագրական Հանդէս», գիրք 12-րդ, Թիֆլիս, 1905, էջ 180:

² Ս. Շահումյան, Լճախի պատմություն Դաւիթ Քեկին..., էջ 67—68:

³ Պ. Հարությունյան, նույն տեղում, էջ 93:

վէր, բաղմացուցանէր. և զԱստուածն ամենակարող յօգնութիւն՝ ինքեան կոչէր»¹:

Իսկ Դավիթ-Քեկի 1727 թ. գործունեության մասին պատմիչն ավելացնում է. «Արդ յամի տեառն 1727, որ այն հինգերորդ ամ էր գալստեանն Դավթի ի հափան, իբրև տեսանէր Դաւիթ Բէգն ի վերին խնամոցն զթշնամիսն իւր յամենայն ուրեք յառաջի իւր վանեալս և խորտակեալս առաքեաց Շահ-Քահմազ արքային պարսից զչորս բեռինս գլխովք սպանելոց, ի բաղմութենէ կոտորածին, զորս ի յօսմանցւոցն կոտորեցին»²: Շահ-Քահմազը, իմանալով, որ Դավիթ-Քեկը տվյալ դեպքում հայերի և պարսիկների ընդհանուր թշնամի օսմանցիներին այսպէս հաջող կոտորում և Սյունիքի սահմաններից դուրս է քշում, գրում է նրան հետևյալ հրովարտակը. «Շահ-Քահմազ արքայ Պարսից առ քաջդ Դաւիթ բէգ, և առ քաջ զորավարսդ հայոց, որք ընդ քեզ են՝ ողջոյն. ի բաղմաց բազում անգամ ազդ եղև մեզ՝ քաջութեանց քոց. բայց արդ՝ իբր ականատես իսկ եղեալ մեր զձերոց մեծամեծ քաջութեանց, որ ընդ դէմ թշնամեաց մերոց: Ահա արդ կացուցի զքեզ այսօր իշխանն, և գլուխ ամենայն իշխանաց մերոց, որք են ի կողմանսդ յայդոսիկ. և երկիրդ հափանու՝ զոր կալար քաջութեամբ, բեղ լիցի: Բայց դու ելցես, և ժողովես առ քեզ զամենայն զօրս, և զհանս ի կողմանցդ այդոցիկ, և ի բաց հանցես զօսմանցին ի սահմանաց քոց»³: Այսուհետև տևեց Դավթի շարունակում է, որ Շահ-Քահմազից այս հրովարտակն ստանալուց հետո նույն թ., այսինքն 1727 թ. «...եւ գնաց Դաւիթ ի Հալիձորոյ ի Մեղրի, և բնակեցաւ անդ. և ժողովեալ առ ինքն զամենայն զօրսն ի Մեղրոյ, և ի Զանդորոյ, խաղաց գնաց անտի, և բնակեցաւ ի Կարճիվան աւանն. և հանդէս արարեալ անդ ամենայն զօրացն՝ առաքէ զնոսա ի ձեռն քաջ զօրավարացն ի վերայ Օրդուվար քաղաքի»⁴:

Այսուհետև Ստեփանոս Շահումյանը պատմում է Դավիթ-Քեկի գլխավորութիւնով հայ ազատագրական զորքերի կառուարած մարտական գործողութիւնները օսմանցիների դէմ՝ Օրդուբադում և Ագուլիսում, պատմում է Ագուլիսում Մելիք-Փարսադանի սպանութիւնը դավաճան Մելիք-Մուսիի կողմից և այլն:

Ինչպէս տեսնում ենք, 1726—1728 թթ. օսմանցիների դէմ մղված բոլոր մարտերը տեղի են ունեցել Դավթ-Քեկի գլխավորութիւնով ու անմիջական մասնակցութիւնով Պ. Հարութիւնյանը նեղ տեղից դուրս գալու համար՝ փորձում է 1726—1728 թթ. կատարված վերոհիշյալ դեպքերի մի մասի տարբերվելը ետ տանել, մնացած դեպքերն էլ կապել Մխիթար սպարապետի անվան հետ, առանց կարողանալու որևէ կերպ հիմնավորել:

Սյունիքի սահմանների վրա առաջին անգամ օսմանցիների հարձակման մասին Ստեփանոս Շահումյանը հաղորդում է. «Արդ ոտքս (օսմանցիները) իբրև այսպէս զօրացն ի կողմանս յայնոսիկ, և զմայրաքաղաքն Երևանայ յետ բաղում ժամանակաց պաշարմանն առին, և զամենայն բնակիչսն ի սուր սուսերի մաշեցին: Ապա յամի տեառն 1726 և ի թուականութեան հայոց 1175, անթիւ անհամար զօրօք ի Սիւնեաց աշխարհն մխեացն, և կալան յամենայն կողմանց զերկիրն Դաւթի, զեօթնարերդ գաւառն հափանու»⁵:

¹ Ս. Շահումյան, Ընտիր պատմութիւն Դաւիթ Բէգին..., էջ 46:

² Նույն տեղում, էջ 58:

³ Նույն տեղում, էջ 58—59:

⁴ Նույն տեղում, էջ 59—60:

⁵ Նույն տեղում, էջ 43:

Պ. Հարությունյանը մերժելով պատմիչի հաղորդած այդ վկայությունը, պնդում է, որ Սյունիքի սահմանների վրա օսմանցիներն առաջին անգամ հարձակվել են ոչ թե 1726 թ., այլ 1725 թվականին: Իր այդ կարծիքը հաստատելու համար նա վկայակոչում է երկու փաստաթուղթ: Մեկը Ղարապետի (Սղնախներում) գտնված Պյոտր 1-ինի պատվիրակ «էլչի» Իվան Կարապետի 1725 թ. մայիսի 11-ին, Պյոտր Անդրեևիչ Տոլստոպին գրած նամակը, իսկ մյուսը՝ 1726 թ. մարտի 24-ին Մխիթար-Բեկի և մյուս յուզբաշիների կողմից ռուսական կառավարությանն ուղղված ուղերձը:

Հարությունյանի վկայակոչած այս երկու փաստերից առաջինը՝ Իվան Կարապետի նամակը, ինչպես հայտնի է օսմանցիներին չի վերաբերում. այդտեղ հիշատակված է Դավիթ-Բեկի պայքարը տեղական խաների ու բեգերի դեմ: Իսկ երկրորդից՝ Մխիթար-Բեկի ուղերձից ամենևին էլ չի երևում, որ օսմանցիները Սյունիքի վրա առաջին անգամ հարձակվել են 1725 թ.: Օրինակ ուղերձում այդ մասին ասված է. «...Այլ ինչ երկարեմք. և յետ սոցա դիմեցան առ մեզ: Եւ մենք Աստուծոյ զօրութեանն ապաւինեցաք, և յուսացաք աթոռս թագաւորութեանդ քոյ, և ակնունելով ձերում իշխանութիւնն և Աստծոյ յօգնութիւն սպառազինեալ պատերազմեցաք յետ օսմանցոց. Աստուծով յաղթեցաք նոքա և պաղում գերիք ևս ապատեցաք: Եւ այժմս օս(մ)անցիք բազմացեալ եկեալ են Դ կողմանէ (մ)եզ պատեալ, դեղօրան(ք)ն առեալ ընդ մեզ պատերազմում, զի ոչ եմք կարում աստր և անդրն շրջիլ՝ այլ մնացեալ եմք ի մէջ դալին, որպէս հաւքն ի մէջ դափանլի»¹:

Ինչպես տեսնում ենք ուղերձի այս տողերից, Սյունիքի վրա օսմանցիների առաջին հարձակման տարեթիվը մնում է տակավին անհայտ: Օսմանցիները 1726 թ. մարտի 24-ից առաջ Սյունիքի սահմաններն են մտել, քայց ե՞րբ, 1725 թ. վերջերի՞ն, թե 1726 թվականի սկզբներին: Մեր կարծիքով ուղերձի այս տվյալները ոչ միայն չեն հակասում պատմիչի այն վկայությանը, որ օսմանցիներն առաջին անգամ Սյունիքի սահմանները մտել են 1726 թ., այլ նույնիսկ հաստատում և լրացնում են այն: Եվ իրոք, օսմանցիները Սյունիքի սահմաններն են մտել 1726 թվականի փետրվարի վերջերին, կամ մարտի սկզբներին, րստ ուղերձի տվյալների, սկզբից զգալի անհաջողություններ են ունեցել, քայց հետո մինչև 1726 թ. մարտի 24-ը, այսինքն մինչև ուղերձի գրվելը, թափանցել են Ղափան, գրավել են նրա մեծագույն մասը և Սյունիքի հայ աղատագրական շարժման համար ստեղծել են այն ծանր վիճակը, որի մասին վերևում ասացինք:

Այնուհետև Պ. Հարությունյանի կարծիքով, ուղերձի այս տողերի համաձայն՝ 1726 թ. գարնան սկզբին, երբ օսմանցիները թափանցել են Ղափան, շրջապատել են նաև Հալիձորի բերդը: Այդ ևս ճիշտ չէ: Ուղերձում խոսքը կոնկրետ Հալիձորի բերդի շրջապատման մասին չէ. այդտեղ նկարագրված է ընդհանրապես Ղափանում ստեղծված ծանր դրությունը: 1726 թ. գարնանը Ղափանում ստեղծված ծանր վիճակի մասին համարյա նույն խոսքերով պատմում է նաև Ստեփանոս Շահումյանը: Նա ասում է. «Յամի տեառն 1726 և ի թուականութեան հայոց 1175, անթիւ անհամար դօրօք (օսմանցիները) ի Սիւնեաց աշխարհն մխեցան, և կալան յամենայն կողմանց զերկիրն Դաւթի, զԵփնաբերդ զաւառան և Խափանու»²:

¹ Պ. Հարությունյան, նույն տեղում, էջ 98—99:

² Ս. Շահումյան, Ընտիր պատմութիւն Դաւիթ Բէկին..., էջ 43:

Ստեփանոս Շահումյանը դրանից անմիջապես հետո ուղղակի ասում է, որ այդ ժամանակ Հալիձորը շրջապատված չէր և Հալիձորի շրջակայքում Դավիթ-Բեկը համառ աշխատանք էր ծավալել իրեն լքած զորքերին նորից համախմբելու և օսմանցիներին Սյունիքից դուրս քշելու համար։ Այնուհետև՝ պատմիչի պարզ ու որոշ հաղորդած թվական տվյալները ցույց են տալիս, որ օսմանցիները շրջապատել են Հալիձորը 1727 թ. փետրվարի վերջերին կամ մարտի սկզբներին։ «Արդ յամսեանն իններորդի յետ գալստեան օսմանցուց ի հափան, — ասում է Ստեփանոս Շահումյանը, — որ այն հինգերորդ ամ էր գալստեան Դավթի, եկին հասին ի հափան ի Սուլթան Ահմէտէն օսմանցուց, Պէլիիր փաշան, և Արապ Ալի փաշայն, բազում զօրօք...»¹։ Ուրեմն, օսմանցիները՝ Ղափան գալուց, 1726 թ. մարտից, 9 ամիս հետո, այսինքն 1727 թ. հունվարին, որ Դավիթ-Բեկի Ղափան գալու 5-րդ տարին էր, օգնական զորք են ստացել, Պեքիր և Արապ փաշաների գլխավորությամբ, որից հետո ամբողջ ձմեռը նախապատրաստվել են, իրենց շուրջն են համախմբել տեղի խաների ու մելիքների մի ստվար մասը. — որոնք այդ ժամանակ ծախվել էին օսմանցիներին և Սյունիքի հայ ազատագրական շարժման նկատմամբ թշնամական դիրք էին բռնել — և 1727 թ. գարնանը սկսել են հարձակումը Հալիձորի վրա։ «Եւ (օսմանցիները) հանդէս արարեալ ամենայն զօրացն, — ասում է Ստեփանոս Շահումյանը, — կարգեցան, պատրաստեցան, դիմեցին գալ ի վերայ Դավթ Բէգին. և եկին բնակեցան յայնկոյս գետոյն հանդէպ Հալիձորոյ, երեքտասաներորդում աւուր քառասունորդաց պահոց»², ուրեմն՝ 1727 թ. մեծ պատի 13-րդ օրում, այսինքն փետրվարի վերջին կամ մարտի սկզբներին։ Ահա այդ ժամանակ էլ Հալիձորի բերդում շրջապատված հայ զորքերի հանդուգն հարձակումով Հալիձորի տակ ջախջախվում են օսմանցիները և աստիճանաբար դուրս բռնում Սյունիքից։

Այդ դեպքերից հետո, ինչպես վերևում արդեն հիշատակել ենք, պատմիչի մոտ հաջորդականությամբ հիշատակվում են՝ Դավիթ-Բեկի և Շահ-Քահազի րազաբական հարաբերությունները, Օրդուբադի և Ագուլիսի պատերազմական գործողությունները հայերի և օսմանցիների միջև նույնպես 1727 թ.։ Ուրեմն, ըստ պատմիչի Ագուլիսի դեպքերը և ագուլիսցի մելիք-Մուսիի կողմից, դավադրությամբ Դավթ-Բեկի զորապետներից մեկի՝ մելիք-Փարսադանի սպանությունը տեղի է ունեցել 1727 թ.։ Պ. Հարությունյանը չհամաձայնելով պատմիչի հետ, պնդում է, որ Ագուլիսի դեպքերը տեղի են ունեցել ոչ թե 1727 թ. այլ 1724 թ. և այդ ժամանակ էլ սպանվել է մելիք-Փարսադանը։

Հարությունյանն իր այդ կարծիքը հիմնավորելու համար բերում է հետևյալ երեք փաստարկները. ա) Ագուլիսում մելիք-Փարսադանի գերեզմանաքարի վրա գրված է, որ նա մահացել է 1724 թ.։ բ) 1726 թ. մարտի 24-ին ուսական կառավարությանն ուղղված ուղերձի տակ մելիք-Փարսադանը չի ստորագրել, այլ նրա փոխարեն ստորագրել է նրա որդի մելիք-Պալասանը (Պալին)։ գ) Ագուլիսցիները Դավթ-Բեկի դեմ ապստամբել են 1724 թ. որովհետև այդ ժամանակ յիսուս Ագուլիսն օսմանցիների կողմից գրավված չէր և

¹ Ս. Շահումյան, Ընտիր պատմություն Դավթ Բէգին..., էջ 44—45։

² Նույն տեղում, էջ 45—46։

³ Նույն տեղում, էջ 61—66։

ագուլիսցիները՝ շարունակում էին հենվել պարսիկների վրա՝ ընդդեմ Դավիթ-Բեկի¹:

Մեր կարծիքով ընկ. Հարությունյանի այդ երեք փաստարկումներն էլ անհիմն են: Նախ՝ Ագուլիսի վերոհիշյալ դեպքերի ժամանակ Ագուլիսն արդեն ենթարկված էր օսմանցիներին: Այդ հաստատվում է մի կողմից Ստեփանոս Շահումյանի ուղղակի ցուցումներով, իսկ մյուս կողմից Հայկական ՍՍԻ Պետական Մատենադարանի № 2121 ձեռագրում Հովակիմ Դպիրի 1725 թ. դրած հիշատակարանից: Հովակիմ դպիրի վկայությամբ, Գողթանի «խաս» կոչված դյուղերը, այդ թվում և Ագուլիսը, կամավոր կերպով հանձնվել են օսմանցիներին²: Հետաքրքրական է, որ Հովակիմ Դպիրի այդ ցուցումը համընկնում է Ստեփանոս Շահումյանի հետևյալ վկայությանը.

«...Ձի իշխանքն Ագուլեցուց ծածկապէս դաշնադիրք էին ընդ օսմանցուց...»: Եվ այդ պատճառով էլ, ասում է Ստեփանոս Շահումյանը, Ագուլիսում «Մելիք Մուսին (որ նա ինքն էր քաղաքապետն) իբրև դայր յանդիման լինէր՝ Դաւիթ իւրոցն հրաման տայր, և ասէր ի չիշերիս յայսմիկ հատէք զգլուխն Մոսեայ, զի այր նենգաւոր է նա և խարդախ, բայց Մելիք Փարսադան յառաջ մատուցեալ բարեխօս լինէր վասն նորա, և զվճիռ մահու դարձուցանէր»³: Այնուհետև պատմիչը որոշակի ասում է, որ Դավիթ-Բեկի զորքերը երբ մասն Ագուլիս, զնացին և Ագուլիսի շուկան՝ օսմանցիների մասին տեղեկություններ հավաքելու և իմացան, որ օսմանցիների հարկահաններն իրենց զաւուց առաջ Ագուլիսից փախել են⁴: Որից հետո պատմիչը մանրամասն հաղորդում է Ագուլիսի տակ Դավիթ-Բեկի զորքերի և օսմանցիների երեք ընդհարումների, հատկապէս Մարադա դաշտի ճակատամարտի և օսմանցիների պարտության մասին: «Եւ մնացեալ սոցա (Դավիթ-Բեկի զորքերը) անդ (Ագուլիսում) ի միջոցի տասն աւուրց, — ասում է Ստեփանոս Շահումյանը, — երիցս անգամ յարձակեցան զօրքն օսմանցուց ի վերայ նոցա, և երիցս խորտակեցան ի քաջամարտիկ զօրացն Դաւիթ»⁵: Այս որոշակի փաստերից հետո մի՞թէ պարզ չէ, որ Ագուլիսի դեպքերը չէին կարող 1724 թ. լինել, քանի որ 1724 թ., ինչպես հաստատում է նաև ինքը Պ. Հարությունյանը, օսմանցիները նախիջևանի և Ագուլիսի սահմանները դեռ չէին մտել. էլ ինչպե՞ս կարող էր պատահել, որ ագուլիսցի մելիք-Մուսիի կողմից դավադրությամբ մելիք-Փարսադանը սպանվեր 1724 թ., քանի որ այդ սպանությունը կատարվել է Ագուլիսի վերոհիշյալ դեպքերի ժամանակ: Ուրեմն, տվյալ դեպքում պետք էր փնտրել մելիք-Փարսադանի գերեզմանաքարի վրա 1724 թ. գրելու թյուրիմացության պատճառները, մանավանդ որ սլատմիչի մոտ հիշատակվում է օսմանցիների կողմից Հալիձորի առաջին շրջապատման նախօրեին՝ 1727 թ. գարնանը, Դավիթ-Բեկի հետ մելիք-Փարսադանի կատարած գործողությունը⁶:

Մելիք-Փարսադանի տապանադրի վերաբերյալ տեղեկությունը Պ. Հարությունյանը վերցրել է ազգագրագետ Ե. Լալայանի կողմից Զանգեզուրի գավառում գրի առնված Ղափլանի մելիքությունների մասին զրույց-

¹ Պ. Հարությունյան, նույն տեղում, էջ 89—90:

² Հայկական ՍՍԻ Պետական Մատենադարան, № 2121 ձեռագիր, էջ 368 ա.:

³ Ս. Շահումյան, Ընտիր պատմություն Բաւիթ Բէկի, էջ 62—63:

⁴ Նույն տեղում, էջ 61:

⁵ Նույն տեղում, էջ 62—63:

⁶ Նույն տեղում, էջ 44:

ավանդություններից¹։ Եվ Լալայանն իր գրի առած այս ավանդությունների «Երկու խոսք» ներածականում չի ասում, որ մելիք-Փարսաղանի տապանագիրն անձամբ է ընթերցել։ Ընդհակառակը, նա հայտնում է, որ Ագուլիսի հիշյալ դեպքերի մասին ժողովրդի մեջ մնացած հիշողություններն իրեն պատմել է Վերին Ագուլիսի քահանա, 80-ամյա ծերունի Տեր-Մովսես Մելիք-Ստեփանյանը։ Մեր կարծիքով, Մելիք-Փարսաղանի տապանագիրը պարզապես սխալ է ընթերցվել։ Ըստ Ե. Լալայանի, մելիք-Փարսաղանի գերեզմանաքարի վրա գրված է. «Այս է տապան Հալիձորեցի Մելիք-Փարսաղանին որ է որդի Պալասանի։ Թվին ՌՃՀԳ»²։ Բայց ըստ պատմիչի տվյալների պետք է լինի՝ թվին ՌՃՀԶ։ Ուրեմն պարզ է, որ տապանագրի մաշվածության կամ մամռապատվածության պատճառով վերջին Զ-ն ընթերցվել է Դ և 1727 թվականի փոխարեն ստացվել է 1724 թ.։

Ինչ վերաբերում է Պ. Հարությունյանի այն փաստարկմանը, որ Մելիք-Փարսաղանը 1726 թվականի մարտի 24-ին ռուսական կառավարությանը դրված ուղերձի տակ չի ստորագրել, միանգամայն հասկանալի է. մելիք-Փարսաղանն այդ ուղերձի տակ չէր էլ կարող ստորագրել, որովհետև 1726 թ. դարնանը նա Դավիթ-Քեկից անջատվածների շարքում չէր, որոնք գրել են այդ ուղերձը, այլ ինչպես վկայում է պատմիչը, Դավիթ-Քեկի հետ էր³։

Այժմ մի քանի խոսք 1726 թ. դարնանը Դավիթ-Քեկից կարճ ժամանակով բաժանվելուց և կրկին Դավիթ-Քեկին միանալուց հետո. Մխիթար սպարապետի հետագա դործունեության և նրա սպանության տարեթվի մասին։

Ինչպես հայտնի է, 1726 թ. դարնանը, երբ օսմանական զորքերը մտան Սյունիք, սկսվում Դավիթ-Քեկի զորքերի մեջ առաջացավ հուսալքում. այդ ժամանակից մինչև 1727 թ. դարունը, այսինքն մինչև օսմանցիների կողմից Հալիձորի շրջապատումը, Մխիթար սպարապետի անունը պատմիչի մոտ չի հիշատակվում, բայց Հալիձորի շրջապատման ժամանակ նորից Մխիթար սպարապետը հանդես է դալիս և մյուս զորապետների հետ միասին մեծ քաջությամբ մասնակցում է Հալիձորի տակ օսմանցիների ջախջախմանը։ Պատմիչի այս ցուցումից և այն վկայությունից, որ Դավիթ-Քեկի զորքերի մեջ լրում առաջանալուց հետո, Դավիթ-Քեկը չհուսահատվեց, այլ սկսեց համառությամբ ու արիաբար Հալիձորի բերդն ամրացնել, պարեն կուտակել և լքված ու իրենից հեռացած զորքերին նորից իր շուրջը համախմբել, միանգամայն հասկանալի է դառնում, որ Դավիթ-Քեկի ջանքերով Մխիթար սպարապետը մինչև 1727 թ. դարունը կրկին վերադարձել է Դավիթ-Քեկին հավատարիմ մնացած զորքերի շարքը և մեծագույն եռանդով շարունակել է իր պայքարը օսմանական զավթիչների դեմ։ Օսմանցիների դեմ Մխիթար սպարապետի հետագա հերոսական պայքարը և հայ ազատագրական շարժմանը մինչև վերջ հավատարիմ մնալը ցույց է տալիս, որ Մխիթար սպարապետի այդ քայլը՝ 1726 թ. դարնանը Դավիթ-Քեկից ժամանակավոր բաժանվելը, մի չկրկնվող սխալ էր նրա հետագա դործունեության մեջ։

Ստեփանոս Շահումյանի տվյալներից հայտնի է, որ 1728 թ. Դավիթ-Քեկի մահից հետո Սյունիքի հայ ազատագրական շարժման ղեկավար է ընտրվում Մխիթար սպարապետը և նա երկու տարի (1728—1730) գլխավորելով Սյունիքի

¹ «Աղյուսակապ հանդէս», դիրք 12-րդ, Թիֆլիս, 1905, էջ 175—202։

² Նույն տեղում, էջ 188։

³ Մ. Շահումյան, Ընտրյալ պատմություն Դավիթ Քեկի..., էջ 44։

ազատագրական շարժումներն օսմանցիների դեմ, 1730 թ. հնձորեսկ գյուղում դավադրություններ սպանվում է՝

Պ. Հարությունյանը պնդելով իր այն սխալ կարծիքը, թե Դավիթ-Քեկը մահացել է ոչ թե 1728 թվականին, այլ 1725 թ. վերջին կամ 1726 թ. սկզբին, գրում է, որ Մխիթար սպարապետը Սյունիքի հայ ազատագրական շարժումները գլխավորել է ոչ թե 1728—1730, այլ 1726—1727 թթ. և նրա սպանությունն էլ կատարվել է 1727 թ.:

Պ. Հարությունյանի միակ փաստարկումն այն է, որ իբրև Մխիթար սպարապետի տապանադրում հիշատակված է, որ նա սպանվել է 1727 թ.։ Հարությունյանն այդ պնդելու համար վկայակոչում է 1898 թ. «Ազգագրական հանդեսում» հրատարակված Մխիթար սպարապետի տապանագիրը, որի վերջին տողերում խոսք գրված է. «Նահատակուեցաւ ՌՃՂԶ» (1727 թ.)։ Բայց Հարությունյանին ինչպես երևում է, հայտնի չէ, որ Մխիթար սպարապետի տապանագրի այս հրատարակության մեջ սխալ է թույլ տրված և հետագայում հենց յնքը, Ե. Լալայանը լռելյայն ուղղել է իր այդ սխալը 1905 թ. Ե. Լալայանն «Ազգագրական հանդեսում» վերահրատարակել է Մխիթար սպարապետի տապանագիրը և այդտեղ հիշատակված է, որ Մխիթար սպարապետը սպանվել է 1730 թ.։ Մեջ ենք բերում Մխիթար սպարապետի տապանագրի 1905 թ. վերահրատարակված տեքստն ամբողջությամբ։

«Այս է տապան ի հանգստեան,
Իջեալ մարմնով ի գերեզման,
Սայ Մխիթար մեծ անուանեալ,
Սորա օնէր իշխանութիւն,
Սա բեմուրատ զնոց ջիւան.
Որ է երկրէն սայ կեանճով էր
Նահատակուեցաւ ՌՃՂԶ» (1730 թ.)։

Այժմ պարզ է, որ Մխիթար սպարապետի սպանության ժամանակի վերաբերյալ տապանագրի տարեթիվը համընկնում է պատմիչի հաղորդած տարեթվի հետ։ Եվ դրանով ճշտվում է ոչ միայն Մխիթար սպարապետի սպանության (1730 թ.), այլև Դավիթ-Քեկի մահվան (1728 թ.) տարեթիվը, քանի որ Մխիթար սպարապետը սպանվել է, ինչպես այդ հայտնի է պատմիչի տվյալներից, իր իշխանության երկրորդ տարում։ Հետևաբար Սյունիքի հայ ազատագրական շարժումներն օսմանցիների կողմից ճնշվել են ոչ թե 1727 թ., ինչպես սխալմամբ պնդում է Պ. Հարությունյանը, այլ 1730 թ.։ Մանավանդ, որ պատմիչը հաստատում է չորին չի առաքելում նաև Պ. Հարությունյանը, թե հենց Մխիթար-Քեկի սպանության ժամանակ էլ ճնշվել են Սյունիքի հայ ազատագրական շարժումները։

Այսպիսով, ազատասեր հայ ժողովուրդը Սյունիքում իր ազատության ու տնկախության համար պարսկական և օսմանյան զավթիչների դեմ արյունահեղ մարտեր է մղել ոչ թե հինգ տարի (1722—1727), այլ ութ տարի (1722—1730)։ Այդ են հաստատում անհերքելի փաստերը և այդպես էլ մինչև այժմ րնդունված է մեր պատմագրության մեջ։

¹ Մ. Շահումյան, Լևոնի պատմություն Դավիթ Քեկի..., էջ 68—71։

² Պ. Հարությունյան, նույն տեղում, էջ 89։

³ «Ազգագրական հանդես», գիրք Դ, Թիֆլիս, 1898, էջ 33։

⁴ «Ազգագրական հանդես», 12-րդ գիրք, Թիֆլիս, 1903, էջ 197։